



পুঁজিবাজারে সবসময় মুনাফা নয়, ঝুঁকিও আছে: অর্থ উপদেষ্টা



সংগৃহীত ছবি

অর্থ উপদেষ্টা ড. সালেহউদ্দিন আহমেদ বলেছেন, পুঁজিবাজারকে নিয়মিত আয়ের উৎস মনে করা ভুল। সবসময় মুনাফা পাওয়া যায় না, বরং ঝুঁকিও রয়েছে। তিনি মনে করেন, বেসরকারি সুকুক বন্ড চালু হলে মুনাফাযোগ্য খাতে বিনিয়োগ বাড়বে। এছাড়া, পদ্মা সেতুসহ বড় প্রকল্প শেয়ারবাজার থেকেই অর্থায়ন সম্ভব বলে মন্তব্য করেন তিনি।

অর্থ উপদেষ্টা ড. সালেহউদ্দিন আহমেদ সতর্ক করে বলেছেন, পুঁজিবাজার থেকে সবসময় মুনাফা হবে— এ ধারণা সম্পূর্ণ ভুল। তার মতে, শেয়ারবাজারকে যদি নিয়মিত আয়ের উৎস বানানো হয়, তাহলে বিনিয়োগকারীরা ঝুঁকির মুখে পড়বেন।

তিনি বলেন, প্রকৃত মুনাফা আসবে তখনই যখন বেসরকারি সুকুক বন্ড চালু হবে এবং সেখান থেকে উৎপাদনশীল খাতে বিনিয়োগ প্রবাহিত হবে। এতে দেশের শিল্প ও অর্থনীতির প্রকৃত উন্নয়ন সম্ভব হবে।

ড. সালেহউদ্দিন মনে করেন, বড় অবকাঠামো নির্মাণের জন্য সবসময় বৈদেশিক ঋণের প্রয়োজন নেই। উদাহরণ হিসেবে তিনি বলেন, ব্যারিস্টার নাজমুল হুদা যখন যোগাযোগ মন্ত্রী ছিলেন, তখন থেকেই পদ্মা সেতু নিয়ে আলোচনা চলছিল। তখনই তিনি মত দেন, বিশ্বব্যাংকের ঋণ না নিয়ে দেশীয় উৎস থেকে অর্থায়ন করা উচিত।

তার মতে, চাইলে শেয়ারবাজার থেকেই মেগা প্রকল্পের অর্থ তোলা সম্ভব, যা দেশের অর্থনীতিকে আরও শক্তিশালী করবে।